



Mahein Nia Lian Nú. 55, 10 Jullu 2013

Rezidencia Oficial: Dignifika ka Ameasa?

Introdusaun

Media online Tempo Semanal públika tiha ona iha nia portal kona-bá rezidencia oficial ba membru Governu iha Motael – Dili no kompletu ho facilidade luxu sira. Kustu ba rezidencia oficial ne'e hamutuk US\$ 1.5 miloens, ne'ebé projetu ne'e rasik *single source* interesante liu tan projetu ne'e rasik la hatudu informasaun ruma iha palaka, tuir prosesu normal ne'ebé durante ne'e aplika ba projetu Estadu nian. Hanesan montante orsamentu hira maka ba projetu ne'e, tipu de projetu, durasaun konstrusaun no kompañia ida ne'ebé maka kaer projetu ne'e.¹

Wainhira hahu konstrusaun rezidencia oficial Governu nian sai polemika no kritika barak husi públiku ne'ebé kestiona katak rezidencia ne'e hanesan ignoransia ida ba kondisaun sosial no ekonomiku povu Timor-Leste nian.² Membru Governu sira preokupa uluk ba sira nia kondisaun hodi hetan kondisaun no facilidade ne'ebé luxu maibe povu moris sei mukit hela hanesan edukasaun, saúde, agrikultura, infra-estrutura no seitor sira seluk.³

Projetu refere kontinua la'o no finaliza ona, ita bele hare katak rezidencia ida ne'ebé luxu maibe to'o agora seidak iha na'in atu hela iha rezidencia ne'e rasik. Maske inisiu rezidencia ne'e distina ba rezidencia membru Governu nian. Mosu duvidas iha públiku katak se maka atu hela iha rezidencia luxu ida ne'e? Maibe duvidas ida ne'e to'o agora seidak iha resposta serteza ruma.

Opiniaun barak espalla iha públiku no diskusaun sira iha media sosial hanesan facebook no twitter hatete rezidencia ne'e sei entrega ba Prezidenti Repúblika Taur Matan Ruak maka atu hela. Razaun simples ida hatete katak atu dignifika nu'udar Xefe Estadu ne'ebé presiza hela iha kondisaun diak ho facilidade sira ne'ebé naton.⁴

Iha relatoriu ida ne'e Fundasaun Mahein (FM) tenta atu hare husi aspetu siguransa nian, ne'ebé rezidencia oficial ida ne'e, karik sei entrega ba Prezidenti Repúblika Taur Matan Ruak atu hela.

¹ Tempo Semanal. (2012, Novembru 15). Filme Konstrusaun Palacio Residencia Oficial Ministra das Financas. <http://temposemanaltimor.blogspot.com/2012/11/filme-konstrusaun-palacio-residencia.html>

² Jornal Nacional Diario. (2013, Janeiro 25). "Rezidencia MF Kria Diskriminasaun "Husu KAK Investiga". Publika mos iha blog: Timor Hau Nia Doben: <http://www.timorhauniandoben.com/2013/01/rezidencia-mf-kria-diskriminasaun-husu.html>

³ Tempo Semanal. (2012, Dezembru 2). Reasaun Husi Estudantes Universitariu Balun Harii Residencia Oficial Luxu ba Ministra Finansa. <http://temposemanaltimor.blogspot.com/2012/12/reasaun-husi-estudantes-universitariu.html>

⁴ Fundasaun Mahein (FM) akompañia no monitoriza diskusaun sira iha media sosial hanesan facebook no twitter. Diskusaun ne'e Fundasaun Mahein (FM) akompañia iha loron Domingu 30 Juñu 2013 to'o publikasaun artigu ne'e.

Ho prespetiva ida ne'e FM prezenta kestaun sira ne'ebé sei sai hanesan ameasa ba Prezidenti Repúblika iha uma luxu nia laran.

Dignifika no Ameasa

Fontes kredivel ida ne'ebé Fundasaun Mahein (FM) asesu konfirma katak desde Feveiriu 2013 membru Governu balu hahu halo aprosimasaun ho Premeiru Dama Dra. Isabel Ferreira husu Prezidenti Repúblika atu ba hela iha rezidensia oficial ida ne'e ho razaun katak atu dignifika Xefe Estadu. To'o agora kontinua husu Prezidenti Repúblika no Premeira Dama atu ba hela iha ne'eba ho razaun ne'ebé hanesan.⁵

Fundasaun Mahein (FM) duvida tanbasa rezidensia ida ne'e dudu tiha ba Prezidenti Repúblika ne'ebé inisiu rezidensia ne'e distina ba membru Governu balu. Karik tanba kritika barak husi públiku? Fundasaun Mahein (FM) hare katak razaun hirak iha leten la naton atu justifika Prezidenti Repúblika atu hela iha rezidensia oficial ne'e tanba razaun siguransa.⁶

Premieru, jardim ka konsentrasaun públiku nian. Fundasaun Mahein (FM) hare katak rezidensia oficial ne'e besik los ho fatin konsentrasaun publiku nian hanesan jardim Igreja Motael nia oin. Tanba komidade sira sei ba halimar iha ne'eba ho ida ne'e ema bele lansa buat ruma ba rezidensia Prezidenti Repúblika nian.

Segundu, estrada ibun. Movimentu públiku hanesan transporte maka'as tebes iha area refere. Fundasaun Mahein (FM) nia tauk tanba ho motor no kareta ne'ebé movimentu ba – mai bele soe bomba ka meterial sira seluk ne'ebé ameasa ba Prezidenti Repúblika nia vida. Nune'e mos ho movimentu atividade komersiu nian iha portu Dili sai mos hanesan risku ba rezidensia oficial ne'e.

Terseiru, rezidensia oficial ne'ebé iha komidade nia leet. Fundasaun Mahein (FM) nia hare katak ema bele aproveita ho komidade sira ne'ebé hela hale'u rezidensia Prezidenti Repúblika bele soe bomba ka granada ka lansa asaun seluk hasoru Prezidenti Repúblika.

Kuartu, besik ho Igreja. Iha kultura Igreja Katolika nian sarani no komidade sira loran-loran nakonu iha Igreja, partisipa misa iha domingo inklui loran santu sira. Ho konsentrasaun komidade nian ne'e ema bele aproveita movimentu sira ne'ebé la'o ba – mai, hodi halo atakes ruma hasoru Prezidenti Repúblika.

Kintu, portaun tama - sai ida deit. Tanba karik mosu asidenti hanesan ahi han uma ka rezidensia oficial ne'e, susar tebes atu lori sai Prezidenti Repúblika ho nia familia.

Fundasaun Mahein (FM) hare katak la serve Prezidenti Repúblika atu hela iha rezidensia oficial ne'e. Tanba rezidensia oficial ne'e sei sai hanesan ameasa ba Prezidenti Repúblika rasik. Portantu Fundasaun Mahein (FM) hare katak ameasa ne'e nia forma oin-oin, bele mai husi

⁵ Entrevista pesoal ho fontes kredivel ida. Iha loran Tersa Feira, 02 Jullu 2013. Dili.

⁶ Fundasaun Mahein. (2013, Jullu 03). Security Sector Discusion – SSD. Dili

komunidade rasik, krime organizadu sira, ka grupu interese sira ne'ebé hakarak destroi estabilidade povu Timor-Leste nian.⁷

Iha lidun seluk, karik iha vizita ofisial ruma ba rezidensia Prezidenti Repúblika nian ka enkontru ofisial ruma sei implika mos movimentu públiku nia mos tanba sei taka dalan iha parte refere. Ne'ebé rezidensia ne'e rasik besik ho estrada protokolu ho movimentu públiku maka'as tebes no movimentu atividade komersiu iha portu Dili liu husi dalan ne'e.⁸

Ho ida ne'e, Fundasaun Mahein (FM) husu ekipa siguransa Prezidenti Repúblika nian atu halo observasaun no estudu siguransa nian baze ba ameasa no risku sira, antes foti desizaun Prezidenti Repúblika ba hela iha rezidensia ofisial ne'e. Maske rezidensia ofisial ne'e sei hanesan polemika deit iha públiku.⁹

Esperiensia Atentadu 11 Feveiru 2008

Timor-Leste foin hakat tinan lima atentadu 11 Feveiru 2008 ne'ebé atake husi grupu armadu lidera husi matebian eis Maijor Alfredo Reinaldo hasoru eis Prezidenti Repúblika Dr. Jose Ramos Horta iha nia rezidensia Metiaut – Dili no grupu eis Tenente Gastão Salsinha atake hasoru konvoiu Premeiru Ministru Kay Rala Xanana Gusmão iha dalan Balibar mai Dili.¹⁰

Povu Timor-Leste sai sasin ba atentadu ida ne'e no sei manas hela iha povu nia kakutak, situasaun ida traumatiku tebe-tebes. Eis Prezidenti Repúblika Dr. Jose Ramos Horta sai vitima no hetan kanek todan nu'udar rezultadu husi atakes husi grupu armadu sira iha atentadu 11 Feveiru 2008.

Fundasaun Mahein (FM) hare iha situasaun ida ne'e, atentadu ne'ebé hasoru eis Prezidenti Repúblika Dr. Jose Ramos Horta, buat ida ne'ebé ema nunca espera atu akontese no la konsidera iha aspetu siguransa nian ba Prezidenti Repúblika. Ida ne'e nu'udar failansu husi autoridade siguransa nian la iha estudu siguransa baze ba ameasa ka risku. Portantu rezidensia eis Prezidenti Repúblika Dr. Jose Ramos Horta hela iha estrada ibun no hela sidade ninin no rabat iha foho lolon, maske iha siguransa husi autoridade polisia no militar. Buat ne'ebé akontese, eis Maijor Alfredo Reinaldo ho nia eskoltu mate iha fatin akontesementu no elementu sira seluk halai sai husi fatin atentadu nian, no lori tempu naruk ho operasaun konjuntu hafoin halo kapturasaun ba elementu hirak ne'e.

Ho ida ne'e la bele ignora tiha karik iha ameasa seluk hasoru rezidensia ofisial Motael ne'ebé tenta atu dudu ba Prezidenti Repúblika Taur Matan Ruak. Autoridade polisial no militar presiza halo estudu siguransa baze ba ameasa ka risku sira ba ambiente rezidensia ne'e. Tanba ameasa bele ho forma seluk aproveita ambiente rezidensia nian ne'ebé besik ho jardim ka konsentrasaun públiku nian, estrada ibun, iha komunidade nia leet no besik ho Igreja.

⁷ Entrevista pesoal ho fontes kredivel ida. Iha lora Tersa Feira, 02 Julu 2013. Dili.

⁸ Fundasaun Mahein. (2013, Julu 03). Security Sector Discussion – SSD. Dili

⁹ Entrevista pesoal ho fontes kredivel ida. Iha lora Tersa Feira, 02 Julu 2013. Dili.

¹⁰ Atentadu ida ne'ebé hafoin krize política no militar hasoru Prezidente Repúblika Dr. Jose Ramos Horta iha nia rezidensia rasik Metiaut – Dili no hasoru mos Premeiru Ministru Kay Rala Xanana Gusmão iha dalan Balibar mai Dili husi grupu armadu sira ne'ebé lidera husi eis Komandante Polisia Militar F-FDTL Maijor Alfredo Reinaldo no Porta-voz Petisionariu nian Tenente Gastão Salsinha.

Sumariu Rekomendasaun

1. Rekomenda ba Prezidenti Repúblika no Premeira Dama presiza deklara ba povu Timor-Leste, tuir informasaun ne'ebé espalla iha komidade nia leet ne'ebé Prezidenti Repúblika sei simu rezidensia ofisial ne'e, maske inisiu destina ba rezidensia membru Governu maibe ikus tenta dudu ba Prezidenti Repúblika maka atu hela.
2. Fundasaun Mahein (FM) nian hare katak ambiente rezidensia ne'e la serve ba Prezidenti Repúblika atu hela tanba la seguru.
3. Rekomenda ba Servisu Nasional Intelejensia – SNI presiza halo survei intelejensia iha ambiente refere no postura rezidensia ofisial ne'e rasik tuir padraun servisu intelejensia nian.
4. Casa Militar – Prezidencia Repúblika ne'ebé integra autoridade militar no polisia presiza halo estudu siguransa baze ba ameasa no risku sira ne'ebé sei afeita ba rezidensia ne'e karik rezidensia ofisial ne'e dudu ba Prezidenti Repúblika.
5. Governu presiza deklara ba povu Timor-Leste, tanbasa membru Governu ne'ebé distina ba rezidensia ofisial ne'e lakohi hela iha rezidensia ne'e rasik no atu dudu rezidensia ofisial ida ne'e ba Prezidenti Repúblika atu hela ne'ebé inisiu hahu konstrusaun sai polemika tiha ona, ka iha razaun seluk, povu Timor-Leste presiza hatene.

Bibliografia

- Jornal Nacional Diario. Rezidencia MF Kria Diskriminasaun “Husu KAK Investiga”. Sesta Feira, 25 Janeiro 2013. Publika mos iha blog: Timor Hau Nia Doben
<http://www.timorhauniandoben.com/2013/01/rezidencia-mf-kria-diskriminasaun-husu.html>
- Tempo Semanal. Filme Konstrusaun Palacio Residencia Oficial Ministra das Financas. Dili, 15 Novembru 2012. <http://temposemanaltimor.blogspot.com/2012/11/filme-konstrusaun-palacio-residencia.html>
- Tempo Semanal. Reasaun Husi Estudantes Universitariu Balun Harii Residencia Oficial Luxu ba Ministra Finansa. Domingo, 2 Dezembru 2012.
<http://temposemanaltimor.blogspot.com/2012/12/reasaun-husi-estudantes-universitariu.html>
- Fundasaun Mahein (FM) akompañia no monitoriza diskusaun sira iha media sosial hanesan facebook no twiter. Diskusaun ne'e Fundasaun Mahein (FM) akompañia iha loron Domingo 30 Juñu 2013 to'o publikasaun artigu ne'e.
- Intervista pesoal ho fontes kredivel ida. Iha loron Tersa Feira, 02 Jullu 2013. Dili.